

Կ Ա Ր Գ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՐՏԱՔԻՆ ԳՈՐԾԵՐԻ ՆԱԽԱՐԱ-
ՐՈՒԹՅԱՆ ԿՈՂՄԻՑ ՓԱՍՏԱԹՂԹԵՐԻ ԻՍԿՈՒԹՅՈՒՆԸ ՊԱՐԶԵԼՈՒ

1. Սույն կարգի նպատակը Հայաստանի Հանրապետության իրավասու պետա-
կան մարմինների կամ կազմակերպությունների կողմից տրվող պաշտոնական փաս-
տաթղթերի իսկության պարզումը և կեղծված փաստաթղթերի շրջանառության կանխումն է:

2. Հայաստանի Հանրապետության արտաքին գործերի նախարարության կողմից
Հայաստանի Հանրապետության պաշտոնական փաստաթղթերի իսկությունը պարզվում է
փաստաթղթի իրականությանը համապատասխանելու հետ կապված հարցման հիման վրա:
Հարցումները կարող են ներկայացվել`

1) օտարերկրյա պետությունում բնակվող կամ գտնվող իրավաբանական և ֆիզի-
կական անձանցից (միայն իրենց վերաբերյալ փաստաթղթերի իսկությունն ստուգելու
խնդրանքով) կամ օտարերկրյա պետության իրավասու մարմինների կողմից` համա-
պատասխան պետությունում Հայաստանի Հանրապետության դիվանագիտական ներ-
կայացուցչությունների կամ հյուպատոսական հիմնարկների միջոցով.

2) Հայաստանի Հանրապետությունում հավատարմագրված օտարերկրյա դիվա-
նագիտական ներկայացուցչությունների կամ հյուպատոսական հիմնարկների կողմից:

3. Սույն կարգը չի տարածվում փաստաթղթերի` ապոստիլով վավերացման կամ
հյուպատոսական վավերացման նպատակով փաստաթղթերի իսկությունը (փաստաթուղթն
ստորագրած անձի պաշտոնի, ստորագրության, ինչպես նաև այդ փաստաթղթի վրա

դրված կնիքի կամ դրոշմակնիքի իսկությունը) պարզելու հետ կապված հարաբերությունների վրա:

4. Հայաստանի Հանրապետության արտաքին գործերի նախարարությունը փաստաթղթերի իսկությունը պարզելու նպատակով համապատասխան հարցումն ստանալուց հետո երեք աշխատանքային օրվա ընթացքում այդ փաստաթղթի բնօրինակը կամ պատճենը կամ փաստաթուղթը բնորոշող տվյալները ներկայացնում է Հայաստանի Հանրապետության համապատասխան իրավասու պետական մարմին կամ կազմակերպություն, որը տրամադրել կամ ենթադրաբար տրամադրել է համապատասխան փաստաթուղթը կամ, որը, համաձայն Հայաստանի Հանրապետության օրենսդրության, ունի անհրաժեշտ տվյալներ տվյալ փաստաթղթի տրամադրման հիմքերի վերաբերյալ կամ վարում է համապատասխան փաստաթղթերի հաշվառումը, կամ վերահսկողություն է իրականացնում այդ փաստաթղթերի տրամադրման նկատմամբ:

5. Սույն կարգի 4-րդ կետում նշված պետական մարմինները կամ կազմակերպությունները Հայաստանի Հանրապետության արտաքին գործերի նախարարության հարցմանը պատասխանում են տասն աշխատանքային օրվա ընթացքում:

6. Սույն կարգի 4-րդ կետում նշված պետական մարմինների կամ կազմակերպությունների կողմից երրորդ պետական մարմնից կամ կազմակերպությունից լրացուցիչ հարցում իրականացնելու անհրաժեշտության դեպքում սույն կարգի 5-րդ կետում նշված ժամկետում տեղեկացնում են Հայաստանի Հանրապետության արտաքին գործերի նախարարությանը՝ լրացուցիչ ստուգման անհրաժեշտության մասին և հարցմանը պատասխանում են սույն կարգի 5-րդ կետում նշված ժամկետը լրանալուց հետո հինգ աշխատանքային օրվա ընթացքում:

7. Արտաքին գործերի նախարարության կողմից վավերացված փաստաթղթեր կամ օտարերկրյա պետություններում հավաստարմագրված Հայաստանի Հանրապե-

տության դիվանագիտական ներկայացուցչությունների կամ հյուպատոսական հիմնարկների՝ նոտարական կարգով վավերացրած կամ հաստատած փաստաթղթերի իսկությունը Հայաստանի Հանրապետության արտաքին գործերի նախարարությունը երկու աշխատանքային օրվա ընթացքում ստուգում է իր տրամադրության տակ եղած տվյալների, այդ թվում՝ հաշվառման մատյանների հիման վրա:

8. Սույն կարգի 4-7-րդ կետերում նշված ստուգման արդյունքներն ստանալուց հետո երեք աշխատանքային օրվա ընթացքում Հայաստանի Հանրապետության արտաքին գործերի նախարարությունը պատասխանն ուղարկում է հարցման նախաձեռնողին:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ
ՂԵԿԱՎԱՐ

Դ. ՍԱՐԳՍՅԱՆ